

Reykjavík, 15. maí 2018
R18010339
22140


Borgarráð

Skipulagsská dvalar og hjúkrunarheimilisins Grund

Lagt er til að hjálagðar breytingar á skipulagskrá dvalar- og hjúkrunarheimilisins Grund verði samþykktar.

Dagur B. Eggertsson

Hjálagt:
Bréf frá forstjóra Grundar, dags. 15. mars 2018, ásamt nýrri skipulagsskrá Grundar.



Reykjavík 15. mars 2018

Borgarstjóri Reykjavíkur

Dagur B. Eggertsson

Varðar: Skipulagsskrá Grundar

Með bréfi þessu óskar stjórn Grundar, 580169-1209, eftir samþykki borgarstjórnar Reykjavíkur á breytingu á skipulagsskrá Grundar.

Grund óskaði eftir því við Sýslumannsembættið á Norðurlandi vestra þann 15. mars 2016 að breyta nafni heimilisins úr Grund, elli- og hjúkrunarheimili í Grund hjúkrunarheimili. Aftur óskar stjórn Grundar eftir því við sama embætti þann 1. nóvember sama ár að breyta nafni Grundar hjúkrunarheimilis í Grund. Einhverra hluta vegna fórst fyrir að bera þessar nafnabreytingar undir borgarstjórn Reykjavíkur og er beðist velvirðingar á því. Með bréfi þessu er óskað eftir samþykki borgarstjórnar Reykjavíkur að ofangreindar nafnabreytingar gangi eftir.

Samhliða framangreindum nafnabreytingum kæmi *Grund* þá í stað *Elliheimilis* í greinum 1., 2., 3., 4, 5., 6., 7. og 8.

Þá er óskað eftir samþykki borgarstjórnar að við 1. grein bætist við eftirfarandi texti:

„Í þeim tilgangi að reka dvalar- og hjúkrunarheimilisþjónustu skal stjórn Grundar heimilt að stofna félagasamtök (almenn félög - Rekstrarform N1 hjá Fyrirtækjaskrá Ríkisskattstjóra) sem eru í eigu stofnunarinnar, undir yfirstjórn og á ábyrgð hennar. Þau almennu félög sem um ræðir eru nú Dvalarheimilið Ás, kt. 430169-1229 og Mörk hjúkrunarheimli kt. 600510-0100; en heimiilt er stjórn Grundar að stofna önnur félög til reksturs dvalar eða hjúkrunarheimila í eigu stofnunarinnar. Hvert félaganna er sjálfstæður lögaðili og með sérstakar samþykktir sem marka réttarsambandið milli þeirra og móðurfélagsins; sjálfseignarstofnunarinnar Grundar.“

Óskað er eftir samþykki borgarstjórnar að úr fyrstu setningu 3. greinar falli „*búsettum í Reykjavík*“

Einnig er óskað eftir samþykki borgarstjórnar að 5. grein verði svo hljóðandi:

„Peningar þeir, sem Grund eða félög í eigu þess eiga eða eignast, skulu jafnóðum ávaxtaðir á þann hátt sem stjórnendur meta hagfelldastan á hverjum tíma.“


Þá er í lokin óskað eftir samþykki borgarstjórnar að breyta 7. og 8. grein á þann hátt að *bæjarstjórn* verði *borgarstjórn* og „*aðalsjúkrahús ríkisins „Landsspítalans“*“ verði breytt í „*Landspítala háskólasjúkrahús.*“ Þar að auki verði stafsetning færð til nútímans, vjer verði vér o.s.frv.

Sjá meðfylgjandi endanlega undirritaða skipulagsskrá Grundar auk ljósrits af upphaflegu skipulagsskránni, sem fékkst send frá fulltrúa Sýslumanns Norðurlands vestra, Auði Steingrímsdóttur.

Greinargerð:

Skipulagsskrá Grundar er frá árinu 1925, staðfest af Kristjáni X Danakonungi 30. janúar sama ár, og hefur aldrei verið breytt. Starfsemi Grundar hefur vaxið undanfarin ár, sérstaklega má nefna aukin umsvif við Suðurlandsbraut 58 – 70. Þá leggur nýr samningur á milli heimilanna þriggja, Grundar, Áss og Markar annars vegar og Sjúkratrygginga Íslands hins vegar um hjúkrunarheimilisrekstur þeirra, auknar skyldur á heimilin að aðgreina rekstur fasteigna annars vegar og umönnunarpátt hins vegar. Til að geta komið til móts við slíkt ásamt því að skipulagsskráin standist nútíma kröfur opinberra aðila, t.d. RSK, hvað varðar stofnun, skráningu og rekstur tengdra félaga, hefur stjórn Grundar samþykkt breytingar á fyrrnefndri skipulagsskrá. Í upphaflegu skipulagsskránni er gert ráð fyrir að bæjarstjórn Reykjavíkur (nefnt þannig þá) samþykki þær breytingar sem kunna verða gerðar á henni.

Beiðni um breytingu á nafni heimilisins hefur ekki áður verið send borgarstjórn Reykjavíkur eins og fram kemur í erindinu og eðlilegt má teljast að færa stafsetningu til nútímans. Þá telur stjórn Grundar óeðlilegt að útiloka aðra en íbúa Reykjavíkur til stjórnarsetu og að stjórn heimilisins hafi frelsi til að velja hvar fjármunir heimilisins verði ávaxtaðir.



Guðrún Birna Gísladóttir

Forstjóri Grundar

SKIPULAGSSKRÁ

fyrir
Grund í Reykjavík

Vér undirritaðir stofnendur og núverandi stjórnendur Grundar við Kaplaskjólsvog í Reykjavík gjörum hér með kunnugt :

Að elliheimili þetta sem stofnað var með almennum samskotum hér í bænum sumarið 1922 er sjálfseignarstofnun.

Eignir stofnunarinnar eru: Steinhúsið „Grund“ við Kaplaskjólsvog ásamt timburskemmu, erfðafestulandi og innanstokksmunum en á þeim hvíla þær ógreiddar skuldir sem stofnaðar hafa verið vegna heimilisins.

Samkvæmt framanskriðuðu, leyfum vér oss nú að setja stofnun þessari eftirfylgjandi:

SKIPULAGSSKRÁ.

1. gr.

Tilgangur stofnunarinnar er og skal jafnan vera sá, að veita gamalmennum heimilsvist á Grund og góða umönnun með svo vægum kjörum sem frekast er unnt, eða jafnvel ókeypis þegar þess er kostur.

Í þessu skyni veitir hún viðtöku gjöfum og hverskonar styrktarfé gömlu fólki til uppeldis.


Í þeim tilgangi að reka dvalar- og hjúkrunarheimilisþjónustu skal stjórn Grundar heimilt að stofna félagasamtök (almenn félög - Rekstrarform N1 hjá Fyrirtækjaskrá Ríkisskattstjóra) sem eru í eigu stofnunarinnar, undir yfirstjórn og á ábyrgð hennar. Þau almennu félög sem um ræðir eru nú Dvalarheimilið Ás, kt. 430169-1229 og Mörk hjúkrunarheimili kt. 600510-0100; en heimilt er stjórn Grundar að stofna önnur félög til reksturs dvalar- eða hjúkrunarheimila í eigu stofnunarinnar. Hvert félaganna er sjálfstæður lögaðili og með sérstakar samþykktir sem marka réttarsambandið milli þeirra og móðurfélagsins; sjálfseignarstofnunarinnar Grundar.

2. gr.

Ekki má selja eða láta af hendi stofnunina eða eignir hennar fastar eða lausar nema andvirði sé beinlínis varið til að halda Grund áfram hér í bænum. Eigi má heldur binda fé hennar eða eignir nokkrum veðböndum eða skuldbindingum, sem óviðkomandi eru tilgangi stofnunarinnar.

3. gr.

Stjórn Grundar skipa nú undirritaðir 5 – fimm – menn og skal hún jafnan skipuð fimm mönnum. Heimilt er stjórninni að kveðja sér til aðstoðar tvo eða þrjá varamenn og fela þeim hlutdeild í stjórnunarstörfum eftir því sem þörf krefur. Verði sæti nefndarmanns autt vegna þess að hann óskar að ganga úr stjórninni eða vegna



burtflutnings eða dauða fyllir nefndin sjálf skarðið með því að setja til bráðabirgða eða skipa til fulls mann í sæti það, sem laust hefir orðið.

4. gr.

Stjórnin skiptir með sér störfum og ræður starfsfólk til Grundar eftir þörfum. Hún veitir heimilisvistirnar og fer með öll fjármál og framkvæmdir. Ber henni yfirleitt að gera sér allt far um að efla hag og heill stofnunarinnar í öllum greinum, og auka hana og stækka er þörf krefur og kringumstæður leyfa.

Stjórnin skal árlega gera reikning yfir rekstur og efnahag Grundar. Skal reikningurinn endurskoðaður af 2 mönnum, öðrum útnefndum af dóms- og kirkjumálaráðuneytinu og hinn af borgarstjóra Reykjavíkur. Stjórn heimilisins úrskurðar svo reikninginn og leggur hann fyrir borgarstjórn Reykjavíkur til athugunar, en útdráttur úr honum skal birtur í opinberu blaði.

5. gr.

Peningar þeir, sem Grund kann að eiga eða eignast, skulu jafnóðum ávaxtaðir á þann hátt sem stjórnendur meta hagfelldastan á hverjum tíma.

6. gr.

Stjórnin setur heimilisreglur fyrir Grund. Hún gerir sér far um, í samvinnu við starfsfólkið, að jafnan ríki á heimilinu kristilegur trúarblær, að húslestrum sé haldið uppi að staðaldri og að hlynt sé að öðrum góðum heimilissiðum. Á þessu ber henni að hafa vakandi auga við ráðningu starfsfólks og við mannaskipti í stjórninni.

7. gr.

Komi einhverntíma að því, að stjórnin sjái sér ekki fært að reka Grund áfram, gefi hún borgararstjórn Reykjavíkur kost á að taka að sér heimilið og allan rekstur þess, en hafni hún því boði, fellur Grund með öllum eigum þess til Landspítala háskólasjúkrahúss í Reykjavík.

8. gr.

Skipulagsskrá þessari getur stjórn Grundar ekki breytt nema með 4/5 atkvæða, þó því aðeins að borgarstjórn Reykjavíkur fallist á breytingarnar og stjórnarráð Íslands staðfesti þær.

Reykjavík, 23. janúar 1925.

Sigurbjörn Á. Gíslason (Ási) Har. Sigurðsson (Unnarstíg 1)

Júl. Árnason (Bankastræti 10) Páll Jónsson (Lækjargötu 6 A)


Flosi Sigurðsson (Lækjargötu 12 A)

Reykjavík 27. mars 2018


Jóhann J. Ólafsson (Kleifarvegur 5)


Guðrún B. Gísladóttir (Brávallagötu 40)


Gísli Páll Pálsson (Hverahlíð 4)


Júlíus Rafnsson (Brávallagötu 40)


Guðbjörg R. Guðmundsdóttir (Selbraut 11)